

Falsafah dan Kebudayaan

Masalah *Qadā'* dan *Qadr*

(3)

Dalam dua bahagian yang telah lalu kita telah menyiarakan penjelasan dua ulama Islam yang terkemuka, iaitu Faḍīlah al-Ustādh Muhammad al-Banna, Mesir dan Faḍīlah al-Ustādh al-Sayyid Muhammad Amin al-Husseini Mufti Palestin. Mereka telah mengupas tuduhan orang-orang Barat yang mengatakan: iktikad kepada *qadā'* dan *qadr* – yang menjadi rukun iman yang keenam itu – menyebabkan kemunduran.

Dan sekarang, dalam bahagian yang ketiga, kita sajikan pula penjelasan al-Ustādh Sabri Abidin dan al-Ustādh Mustafa Zaid dengan selengkapnya, dari majalah “*Liwā' al-Islām*” Mesir – P.Q.

Penjelasan al-Ustādh Sabri Abidin

“*Innā kulla shay'in khalaqnāhu bi qadar; wa mā amrunā illā wāhidatun kalamhi bi¹ al-baṣar.*”

Saya percaya, tuduhan dusta ini, yang telah ditujukan kepada kepercayaan “*qadā'* dan *qadr*”, tidaklah lain daripada suatu serangan di antara serangan-serangan yang dilakukan oleh seteru-seteru Islam, baik dari kalangan orang-orang asing (yang bukan Islam) ataupun dari kalangan murid-murid mereka yang telah disesatkan, yang menamakan diri mereka dengan nama Islam secara turutan-turutan. Tuduhan yang tersebut ialah suatu jalan untuk menentang *al-Qur'an* *al-karīm* dan *al-Hadīth al-sharīf* secara tidak langsung, kerana iktikad “*qadā'* dan *qadr*” itu telah diterangkan dengan jelas dan tegas dalam beberapa ayat di dalam kitab suci *al-Qur'an* dan di dalam *Hadīth-Hadīth* yang sahih dengan banyaknya.

Di dalam *al-Qur'an al-karīm* dijelaskan oleh Allah ‘azza wa jalla dengan firman-Nya:

Ertinya: “Sesungguhnya Kami telah menjadikan tiap-tiap sesuatu itu dengan sukat dan ketetapan yang teratur, dan perintah Kami (pada mewujudkan sesuatu) tidaklah lain melainkan dengan satu kalimah sahaja (dikatakan jadi: maka terjadilah ia) dengan sekilip mata.”

Dan firman-Nya lagi:

“*Wa khalaqa kulla shay'in fa qaddarahū taqdīrā.*”

Ertinya: “Dan Ia (Allah ‘azza wa jalla) telah menjadikan tiap-tiap sesuatu, lalu ditetapkan dengan sukatannya yang teratur.”

Firman-Nya lagi:

“*Sabbih isma rabbika al-a'lā, al-ladhī khalaqa fasawwā, wa al-ladhī qaddara fa hadā*”

¹ di dalam teks asal tiada perkataan ‘*bi*’

Ertinya: “Suciakanlah nama Tuhanmu Yang Maha Tinggi, yang menjadikan lalu disempurnakannya, dan yang mengatur dan menetapkan (jenis-jenis kejadian itu) lalu diberinya pertunjuk². ”

Hadīth-hadīth Rasulullah pula, yang menjelaskan perkara “*qaḍā’* dan *qadr*” ini amatlah banyaknya. Di antaranya yang tegas sekali ialah *Hadīth* dari Sayyidinā ‘Umar ibn al-Khaṭṭāb (yang diriwayatkan oleh Bukhārī dan Muslim) mengenai kedatangan malaikat Jibrīl untuk mengajar sahabat-sahabat Nabī iaitu bagaimana caranya mereka bertanya kepada Nabī *sallā Allāhu ‘alayhi wa sallam* tentang hukum-hukum Islam.

Di dalam *Hadīth* ini dengan tegas disebutkan bahawa Jibrīl


telah bertanya kepada Nabī, katanya:

“Ya Muhammad, khabarkanlah kepadaku tentang iman”,

lalu Nabī menjawab: “Hendaklah kamu beriman kepada Allah, malaikat-malaikat-Nya, kitab-kitab-Nya, rasul-rasul-Nya dan hari akhirat. Dan hendaklah kamu beriman kepada *qadr* (taqdir Tuhan) yang baik dan yang buruk.” Mendengarkan jawapan Nabī yang demikian, berkatalah Jibrīl: “Benarlah apa yang tuan katakan itu”

Dalam suatu *Hadīt*³ sahīh yang lain, yang

diriwayatkan oleh Abū Hurayrah, bahawa Nabī Muḥammad *sallā Allāhu ‘alayhi wa sallam* bersabda:



Suatu pemandangan ketika hujan lebat turun di Tanah Suci Makkah baharu-baharu ini, sehingga air bah merempuh masuk ke dalam Masjid al-Harām separas pinggang.

Dalam gambar kelihatan orang-orang sedang tawaf mengelilingi Bayt Allāh, mengharung air yang masih belum surut pada masa itu. (Gambar saudara Abdulllah Zawawi – Makkah).

² petunjuk

³ Kesalahan teks asal. Sepatutnya ‘*Hadīth*’.

“Inna rūḥa al-qudus (al-malak) nafatha fi rū’ī

*anna nafasan lan tamūṭa hattā tastakmila ajalahā wa tastawfī
rizqahā. Fa amhilū fī al-ṭalab.”*

Ertinya: “Sesungguhnya *Rūḥ al-Quds* (Jibrīl)

telah meniup di dalam hatiku, bahawa seseorang itu tidak sekali-kali akan mati sebelum sempurna ajalnya dan sempurna rezekinya. Oleh itu, sederhanakanlah gerak langkah kamu dalam mencari rezeki.”

Hadīth-hadīth yang menjelaskan masalah ini amatlah banyaknya.

Iktiqad kepada “*qaḍā’* dan *qadr*” itu telah dipersetujui oleh *al-salaf al-ṣāliḥ* (sahabat-sahabat Nabī dan tabiin) semenjak kurun Islam yang pertama, dan telah diterima oleh umat Islam turun-temurun dengan sepenuh-penuh yakin, kerana tiap-tiap seorang Muslim yang yakin, mengerti tentang iktikad *qaḍā’* dan *qadr*, bahawa maksudnya ialah pengliputan Allah ‘azza wa jalla dengan ilmu-Nya dan kudrat-Nya serta iradat-Nya yang

meliputi dan menguasai sekalian makhluk dalam kedua-dua alam: alam bawah dan alam atas, dan bahawa tiap-tiap sesuatu di dalam ‘ālam al-wujūd adalah sedia diketahui oleh Allah ‘azza wa jalla sebelum wujudnya, serta terjadi pula menurut yang diketahui oleh Allah terlebih dahulu sebelum itu. Tentang ini Allah ‘azza wa jalla memberi isyarat dengan firman-Nya:

*Wa mā ya ’zubu ’an rabbika min mithqāli dharratin fī al-ardī
wa lā fī al-samā’i wa lā aṣghara min dhalika wa lā akbara illā
fī kitābin mubin.*

Ertinya: “Dan tiada terlindung dari (pengetahuan)

Tuhanmu sesuatu zarah di bumi, dan tiada (juga) di langit, dan tiada terkecil daripada yang demikian dan tiada terbesar, melainkan (telah sedia termaktub) di dalam kitab yang nyata.”

Jelasnya, Allah ‘azza wa jalla Dialah yang menguasai dengan

ilmu-Nya dan kudrat-Nya serta iradat-Nya atas segala makhluk dan segala kejadian-kejadian yang berlaku, yang kecil dan yang besar, sehingga rayapan seekor semut yang merayap pada malam yang gelap gelita sedia diketahui dan tidak tersembunyi daripada-Nya ‘azza wa jalla, sebagaimana juga ia mengetahui akan perjalanan bintang-bintang dalam alam yang tinggi, dan mengetahui gerak dan diamnya.

Kepercayaan terhadap *qaḍā’* dan *qadr* mempunyai

sebesar-besar kesan dalam kemenangan Islam, dan dalam siarannya dan telah menjuak tinggi akan panji-panjinya. Ia juga mempunyai kesan yang besar di dalam kemenangan puak yang kecil (puak Islam) atas puak yang besar (kaum kafir yang menjadi lawannya), menepati firman Allah Ta‘ālā.

Kam min fi’atin qalīlatin ghalabat fi’atan kathīratam bi idhni Allāhi

wa Allāhu ma ‘a al-ṣābirīn.

“Berapa (banyak kejadian): puak yang sedikit

telah mengalahkan puak yang banyak jumlahnya dengan izin Allah, sesungguhnya Allah beserta orang-orang yang sabar.”

Orang-orang Islam kita yang terdahulu, dari kalangan

sahabat-sahabat Rasulullah *ṣallā Allāhu ‘alayhi wa sallam*, dan pengikut-pengikut mereka, serta yang datang kemudian daripada mereka, yang telah berjihad pada jalan Allah dengan bersungguh-sungguh, mereka kedapatan tunduk percaya kepada *qaḍā’* dan *qadr* itu.

Mereka mengetahui dengan seyakin-yakinnya bahawa kemaraan mereka kerana Allah dengan menempuh medan-medan perang kerana menegakkkan panji-panji kebenaran, tidak akan dapat mengurangi barang sedikit pun daripada umur mereka. Dengan itu nyatalah bahawa kepercayaan terhadap *qaḍā’* dan *qadr*, bukanlah Dia yang menyebabkan kemalasan dan sikap menyerah kepada nasib,

bahkan sebaliknya Dialah yang menyebabkan kemenangan dan menimbulkan kemuliaan.

Seteru-seteru Islam dan pengkor-pengkor mereka dari “orang-orang Islam baka” itu terdorong menyerang kepercayaan terhadap *qaḍā’* dan *qadr* dengan tujuan hendak menyerang (mencela) *Qur’ān* dan *Hadīth*, dan hendak menyerang azam umat Islam yang biasanya dapat menyumbangkan pedang. Mereka hendak mendatangkan syak kepada orang-orang Islam tentang kepercayaan *qaḍā’* dan *qadr*, iaitu kepercayaan yang sangat besar kesannya dalam menghancurkan kerajaan-kerajaan Rom dan Parsi, dan menghancurkan tiap-tiap seteru Islam.

Kita umat Islam dalam zaman ini sangat-sangat berhajat kepada perlindungan Allah dan berpegang kepada kepercayaan yang hening bersih, dengan mengetahui bahawa tiap-tiap seorang manusia adalah tertuntut menjalankan kerja-kerja yang mendatangkan faedah kepada dirinya sendiri dan kepada umat Islam amnya, dan menyediakan alat dan cara yang dapat memelihara negeri-negeri Islam. Orang-orang Islam amnya pula tertuntut berjaga-jaga terhadap niat-niat jahat dari musuh Islam, yang tidak berpada menyerang iktikad mereka dengan kata-kata tetapi juga dengan senjata dan pedang. Kita, seyogianya menurut pertunjuk⁴ firman Allah *Ta ‘ālā*:

Walya ‘khudhū hidhrahum wa aslihatahum, wadda al-ladhīna kafarū law tagħfulūna ‘an asliħatikum wa amti ‘atikum fa yamīlūna ‘alaykum maylatan wāhidah.

“Hendaklah mereka (orang-orang Islam) berjaga-jaga dan bersedia dengan senjata mereka. Orang-orang kafir amatlah suka kalaualah kamu (wahai orang-orang Islam) lalai daripada senjata kamu dan barang-barang (hak kepunyaan) kamu, maka dengan itu mudahlah mereka menggempur kamu dengan sekaligus.”

Pendapat al-Ustādh Mustafa Zaid:

Pada suatu hari, Sayyidinā ‘Umar ibn al-Khaṭṭāb *raḍiya Allāhu ‘anhu* – semasa ia menjadi khalifah – telah dibawa di hadapannya seorang pencuri lalu ditanya: “Apa yang mendesak kamu melakukan perbuatan curi?”

“Allah sudah takdirkan” jawab orang itu.

Sayyidinā ‘Umar pun menjatuhkan hukum iaitu memotong tangan si pencuri itu dan menyebatnya tiga puluh kali, sambil berkata kepadanya:

“Aku memotong tanganmu kerana kamu mencuri, dan menyebatmu kerana kamu berdusta kepada Allah ‘azza wa jalla.’”

Suatu peristiwa yang lain mengenai “*qaḍā’* dan *qadr*” (takdir Tuhan) telah terjadi. Pada suatu hari, ‘Abd Allāh ibn ‘Umar (Ibn al-Khaṭṭāb) telah disampaikan kepadanya: bahawa ada beberapa orang yang melakukan maksiat berkata: perkara itu telah sedia ada dalam pengetahuan Allah.

Perkara yang demikian telah sedia ada dalam pengetahuan Allah”, sahut Ibn ‘Umar, “tetapi pengetahuan Allah itu tidak mendesak kita supaya melakukan maksiat.”

Daripada dua *athar* (kata-kata sahabat-sahabat Nabī) yang tersebut dapatlah kita mengetahui dengan jelas akan fahaman orang-orang Islam zaman dahulu terhadap kepercayaan “*qaḍā’* dan *qadr*” itu.

Ada lagi keterangan yang lebih tegas tentang ini. Dalam suatu *Hadīth* sahih, ada dinyatakan bahawa seorang sahabat telah bertanya kepada Rasulullah *ṣallā Allāhu ‘alayhi wa ălihi wa sallam*:

“Adakah kita melakukan sesuatu perbuatan dalam perkara yang telah termaktub dan telah tergulung

⁴ petunjuk

buku-buku suratannya, atau pun dalam perkara yang akan datang?”

Lalu dijawab oleh Nabī: “ Bahkan dalam perkara-perkara yang telah termaktub dan yang telah tergulung buku-buku suratannya.”

“Kalau begitu, apa kita hendak buat sekarang?” tanya orang itu lagi.

Mendengarkan itu Nabī bersabda:

“*I'malū fa kullu tuyassarun limā khuliqa lahu*”, (bekerjalah kamu, kerana tiap-tiap seorang diberi kemudahan untuk melakukan kerja-kerja yang kerananya ia telah dijadikan oleh Allah ‘azza wa jalla.)

Pada ketika itu kedengaran sahabat-sahabat Nabī berkata sesama sendiri: “Sekarang tibalah saat bekerja dengan bersungguh-sungguh”.

Sebenarnya kepercayaan kepada *qadā*’ dan *qadr* itu itulah setengah daripada perkara yang wajib atas umat Islam supaya sempurna iktikad mereka dan sempurna pula iman mereka, kerana yang demikian telah *thābit* di dalam *Hadīth Sayyidinā ‘Umar* yang telah disebutkan oleh al-Ustādh Ṣabrī ‘Ābidīn tadi. Tetapi apakah tujuan beriman dengan “*qadā*’ dan *qadr*” itu?

Bukanlah tujuan beriman dengan keduanya supaya kita berserah buta dan tidak bekerja, dan supaya kita membiarkan “sebab” lalu kita menunggu akan natijahnya. Allah *subḥānahu wa ta'ālā* telah mengikat sebab dengan musababnya, dan telah mendirikan peraturan alam itu di atas undang-undang yang tersebut. Beriman dengan “*qadā*” (hukum Allah mengenai tinyap-tinyap⁵ sesuatu yang diciptakan-Nya) “*qadr*” (tertib dan peraturan) ialah maksudnya hendaklah kita

beriman bahawa tiada sesuatu yang berlaku dalam alam yang luas ini melainkan bersetujuan dengan apa yang sedia diketahui dan dikehendakki⁶ oleh Allah ‘azza wa jalla. Tetapi ini tidak bermakna supaya kita melakukan apa sahaja perkara-perkara yang kita kehendakki⁷ dari perkara-perkara yang dilarang, di bawah lindungan *qadā*’ dan *qadr*; kerana Allah ‘azza wa jalla telah menyembunyikan daripada kita apa yang telah ditakdirkannya atas kita, dan kita pula tidak ada jalan untuk mengetahuinya melainkan setelah kita melakukannya dengan itu mengetahuilah kita bahawa perkara itu telah ditakdirkan Allah atas kita. Sudah sedia maklum bahawa perkara-perkara yang mendorong suatu perbuatan itu adalah mendahului perbuatan yang tersebut dan bukan mengikutinya, dan “sebab-sebab” itu pula mendahului “natijah-natijah” dan tidak terkebelakang daripadanya. Barangkali kerana pertengkar-pertengkar yang lazimnya timbul ketika membahaskan perkara ini yang tidak berfaedah dan tidak pula mendatangkan sesuatu kebaikan⁸, Rasulullah *sallā Allāhu 'alayhi wa sallam* bersabda:

“*Idhā dhukira al-qadaru fa imsakū.*”

Ertinya: “Apabila masalah takdir Tuhan diperkatakan orang, hendaklah kamu menahan diri (dari mencampuri perbahasan dan pertengkar itu).

Sungguh benar apa yang dikatakan oleh Ja‘far al-Ṣādiq “Bahwasanya Allah menghendaki sesuatu daripada kita, dan berkehendak melakukan sesuatu atas kita. Maka mengapa kita hendak menyibukkan diri dengan perkara yang hendak dilakukan-Nya atas kita daripada perkara yang dikehendakki⁹ kita melakukannya?”

Sebenarnya Islam itu ialah agama amal dan perjuangan, agama kehidupan dan pertentangan. Diwajibkannya

⁶ kehendaki

⁷ kehendaki

⁸ kebaikan

⁹ dikehendakki

⁵ tiap-tiap

amat dan difardukannya menyerah diri (bertawakkal) kepada Allah ‘azza wa jalla, kerana bertawakkal atau menyerah diri sebagaimana yang ditetapkan oleh Islam ialah menggunakan “sebab” dan membiarkan natijahnya bagi Allah. Tidak ada sama sekali suatu alasan yang menunjukkan bahawa Islam menyuruh kita membiarkan “sebab” dan menunggu akan “natijah”. Memang tepat apa yang dikatakan oleh Sayyidinā ‘Umar radiya Allāhu ‘anhu:

“Janganlah seseorang kamu duduk diam di rumahnya lalu menunggu rezeki daripada Allah, kerana langit tidak menghujangkan emas dan tidak juga menghujangkan perak.”

Selain daripada itu, beriktiad dengan *qadā’* dan *qadr* adalah menjadi sebaik-baik perkara yang dapat memelihara seseorang daripada berlaku sompong apabila ia diberi kesenangan dan kemudahan, dan tidak pula resah gelisah apabila ia ditimpa kesusahan dan kepicikan, kerana orang yang beriman dengan *qadā’* dan *qadr* menaruh sepenuh-penuh yakin bahawa perkara-perkara yang baik dan yang jahat itu adalah kedua-duanya datangnya daripada Allah. *I’tiqād* itu juga menjadi sebaik-baik perkara yang memelihara manusia daripada perasaan hasad dengki, kerana apabila ia beriman dengan iktikad *qadā’* dan *qadr* itu, yakinlah dia bahawa tiap-tiap sesuatu yang telah ditetapkan akan diterima oleh manusia sudah barang tentu orang itu akan menerimanya, dan bahawa dengkinya terhadap kesenangan orang lain, tidak sekali-kali akan dapat memindahkan kesenangan itu kepadanya. Demikian juga iktikad (akan *qadā’* dan *qadr*) itu menjadi sebaik-baik galakan yang akan menjadikan seseorang Muslim itu berani, tidak gentarkan maut dan tidak takut akan

kesukaran yang akan ditempuh kelak, kerana dia yakin bahawa ajal itu di tangan Allah, dan bahawa dia tidak akan dikurangkan walau satu hari (atau satu saat sekalipun).

Lebih lanjut, Junjungan kita Nabī Muḥammad ᷃allā Allāhu ‘alayhi wa sallam bersabda:

“*Al-mu’mīnu al-qawiyyu khayrun wa ahabba ilā Allāhi min al-mu’mīni al-da’īf, wa fī kulli khayrun, ahriṣ ‘alā mā yanfa‘uka, wa ista‘in billāhi wa lā ta‘jaz, wa idhā aṣābaka sharrun fa lā taqul law kāna kadhā kāna kadhā, fa inna law taftāhu bāba al-shayṭān.*”

Ertinya: “Orang Mukmin yang kuat lebih baik dan amat dikasihi oleh Allah daripada Mukmin yang lemah, dan di dalam tiap-tiap perkara yang baik, bersungguh-sungguhlah kamu pada melakukan perkara yang mendatangkan faedah kepadamu, dan mintalah bantuan Allah dan janganlah kamu XXmah¹⁰. Apabila kamu ditimpa perkara yang buruk maka janganlah kamu berkata: kalaularah perkara itu begini, (tentulah) akan berlaku begini. Kerana perkataan “kalau” itu, membuka fintu¹¹ syaitan.”

Agama Islam yang demikian isi ajarannya, tidak sepatutnya dituduh sebagai satu agama yang menyuruh manusia kepada berserah dengan buta tuli, XX¹²tau suka supaya mereka bersifat lemah dan menyerah. Sejarah umat Islam yang telah lalu, yang telah berjaya membuka dan menguasai sebahagian besar dari negara-negara dunia adalah menjadi sebesar-besarnya bukti sejarah atas yang demikian itu.

(Dalam bilangan yang akan datang, Qalam in shā’ā Allāh, akan menyiarkan penjelasan al-Ustādh Ahmad al-Sharbasi dan al-Ustādh Muhammad Abu Zahra – P.Q.)

¹⁰ lemah

¹¹ pintu

¹² atau